

Tico Croes:

PROME MINISTRO NEL ODUBER UN BIAHA MAS CU MENTIRA GRANDI

Encuanto garantianan...

ORANJESTAD(AAN) Parlamentario Tico Croes a declara na DIARIO cu despues cu Nel a regresa for di Hulanda, el a purba di tur manera di splica e berguenza grandi cu el a pone henter pueblo di Aruba aden. "E mal maneho di su gobierno el a purba di tapa door di bisa cu e garantianan den tempo di gabinete Eman lo a obliga su gobierno pa laga Hulanda bin goberna nos pais.

"Ya for di e campaña na 1988 nos a tende Sr. Oduber critica e garantianan y despues e furia di su criticanan no a baha ora cu el a tuma gobierno over dia 9 di Februari 1989.

"Den su critica contra e garantianan durante campaña, y como Prome Ministro, Sr. Nel Oduber a crea e impresion cu MEP tabata contra di garantianan. Ora cu nos partido a presenta prueba cu den Parlamento di Aruba, ora cu a trata e asunto di garantianan, tur 8 miembro di fraccion di MEP, incluyendo Nel Oduber (mas



miembro di MEP a vota na fabor di garantia cu AVP), a vota na fabor di e proyectonan aki y hasta a vota elogiando e proyectonan, Prome Ministro Oduber a cambia di argumento.

"E no tabata tin e grandeza manera cu ta ser spera di un Prome Ministro di e pais Aruba, pa e acepta cu el a comete u pifia door di a purba gaña pueblo y haci su trabao pa segura e proyectonan di hotel. Al contrario, ora a bira conoci pa henter pueblo cu Sr. Nel Oduber y MEP a vota na fabor di tur garantia, sin excepcion, Sr. Oduber y MEP a cambia di opinion y a bin cu un otro argumento. Segun Prome Ministro Oduber, el a vota na fabor di e garantia pasobra e no tabata tin tur informacion tempo cu e tabata den oposicion. E pregunta grandi ta: ki mishi bo vota na fabor di un garantia si bo no tabata tin tur informacion? Esaki ta un muestra di un falta total di responsabilidad como partido den oposicion.

"Como ehemplo di falta di infor-

macion, Prome Ministro Oduber cu cierto actitud di sorpresa ta muestra un carta di Banco Central, skirbi door di e Presidente di e tempo ey, Sr. Williams, fecha dia 3 di Maart 1987. Prome Ministro ta haci composifuera ta awor e lo a descubri e carta aki, insinuando cu e lo por a bay contra di e garantianan si e tabata tin e carta aki na ora di aprobacion di e garantianan.

"Segun Prome Ministro Oduber, gabinete Eman lo a sconde e carta aki pa asina pasa e garantianan. Awe nos kier demostra cu ta tristo cu un Prome Ministro di Aruba mester sconde tras di un mentira flagrante pa tapa su fracaso como Prome Ministro.

"Den e reunion di Parlamento teni dia 3 di October 1988 pa trata e garantia di Plantation Bay, Sr. Nel Oduber a zwaai cu e carta di Banco Central di fecha 3 di Maart 1987. Textualmente Sr. Oduber ta bisa e tempo ey ariba pagina 7 di e notulen di e reunion publico: "Nos tin awor aki na garantia, si bo lesa e raport di Banco Central pagina 8, e carta di 3 di Maart

1987 cu nos a presenta parti'e pa tur nos coleganan di Staten cu nan Minister mes no kier duna nan, e ta bisa pa gobierno no para garantia pa mas cu 180 miyon florin."

"Cu esaki nos kier demostra con Prome Ministro Oduber ta usa un mentira flagrante pa kita su responsabilidad y di su partido di e garantianan. Pasobra na e momento di aprobacion di tanto Plantation Bay como Beta Hotel, MEP tabata bon na haltura di e carta di e Presidente di Banco Central, y no solamente nan a vota na fabor di e garantia di tur dos proyecto, pero hasta nan a gaba y elogia e proyectonan aki. Y hasta un miembro di fraccion di MEP di e tempo ey ta bay asina leu pa bisa cu: "Ta prome vez cu nos a haya tur documento completo y na tempo!"

"Ministro Presidente Nel Oduber mester splica pueblo pakico e ta sconde tras di e garantianan pa asina e tapa su maneho di aumento drastico di costo di bida y cu nos Arubianonan por cumpra menos cu e salario cu nan ta ricibi?"